



12 MAR, 2024

Kedai kopi usik meter elektrik didenda RM20,000

Harian Ekspres (KK), Malaysia



Page 1 of 2

Menghalang meter daripada merekod penggunaan sewajarnya

Kedai kopi usik meter elektrik didenda RM20,000

Cynthia D Baga

KOTA KINABALU: Sebuah kedai kopi didenda RM20,000 kerana secara tidak jujur menghalang meter elektrik daripada merekod penggunaan elektrik dengan sewajarnya.

Hakim Mahkamah Sesyen Elsie Primus menjatuhkan hukuman itu terhadap Kedai Kopi 33 selepas pemiliknya mengaku bersalah terhadap pertuduhan yang dikenakan ke atas kedai itu pada Isnin.

Kedai kopi itu didapati melakukan kesalahan itu dengan memutuskan kabel voltan fasa merah dan kuning serta kabel arus fasa merah.

Kesalahan itu berlaku pukul 3.50 petang pada 25 Nov, 2021 di kedai kopi itu di Lorong Bernam 3, Taman Soon Kiong, di sini.

Kesalahan di bawah Seksyen 37(3)(e) Akta Bekalan Elektrik 1990 dan boleh dihukum di bawah Seksyen 37(3)(A) (iii) Akta sama yang memperuntukkan hukuman denda antara RM20,000 dan RM1 juta, atau penjara sehingga lima tahun, atau kedua-duanya, jika sabit kesalahan.

Semasa mitigasi, pemilik merayu hukuman ringan.



Bagaimanapun, Pegawai Pendakwa Norelysha Farhana Mohd Aris menggesa mahkamah menjatuhkan hukuman setimpal.

Mahkamah diberitahu bahawa pada hari tersebut satu pasukan Suruhanjaya Tenaga bersama Sabah Electricity Sdn Bhd (SESB) menyerbu kedai itu susulan aduan.

Susulan pemeriksaan didapati pelekat keselamatan meter tersebut dikoyak di bahagian kiri dan kanan.

Pemeriksaan lanjut kemudiannya mendapati terdapat gangguan pada bahagian meter di mana wayar voltan pada fasa merah dan kuning serta wayar arus pada fasa merah dipotong.

Ini menyebabkan meter SESB tidak dapat merekod bacaan semasa meter sebenar.

Ujian ketepatan yang dilakukan juga mendapati purata bacaan peratusan ralat ketepatan -65.38 peratus telah direkodkan.